

聲聞道和菩薩道的禪定的同異

林崇安教授編

(2014.03.19 講於中央大學三慧社)

一、禪定的基本術語

(1) 等引，是將心平穩地安住於對象上，又稱三摩呬多，是善的心一境性，共有四類：1.靜慮；2.解脫；3.等持；4.等至。

1.靜慮=禪那

2.解脫

3.等持=三摩地=三昧=定

4.等至=三摩鉢底

(2) 舉例

1.靜慮

如，初靜慮=第一禪那=初禪，第二靜慮=第二禪那=第二禪。

2.解脫

如，第八解脫=想受滅身作證具足住解脫。

3.等持

如，三三摩地：空三摩地、無願三摩地、無相三摩地。如，有因、有具聖正三摩地。如，金剛喻三摩地。

4.等至（三摩鉢底）

如，四無色三摩鉢底=四無色等至=四無色定。無想三摩鉢底=無想定。滅盡定三摩鉢底=滅盡定。

(3) 禪定，有時指「禪那」，有時指「定」。《六祖壇經》的「禪定」則是銜接到菩薩道的「禪波羅蜜」，是「定慧一體」：

「外離相即禪，內不亂即定，外禪內定，故名禪定。」

「定慧一體，不是二。定是慧體，慧是定用。即慧之時定在慧，即定之時慧在定。若識此義，即是定慧等學。」

(4) 止=寂止=奢摩他

狹義的止，指近分定。

廣義的止，包含世間道的四色界禪和四無色定。

以下引用彌勒菩薩所說的《瑜伽師地論》來說明聲聞道和菩薩道的禪定。

二、聲聞道的禪定

(一)、修止

《瑜伽師地論》彌勒菩薩說：

奢摩他者，謂九種住心，及奢摩他品所攝諸法。

云何名為「九種心住」？謂有苾芻令心內住、等住、安住、近住、調順、寂靜、最極寂靜、專注一趣，及以等持，如是名為九種心住。

一、內住

云何內住？謂從外一切所緣境界，攝錄其心，繫在於內，令不散亂，此則最初繫縛其心，令住於內，不外散亂，故名內住。

二、等住

云何等住？謂即最初所繫縛心，其性麤動，未能令其等住、遍住故，次即於此所緣境界，以相續方便、澄淨方便，挫令微細，遍攝令住，故名等住。

三、安住

云何安住？謂若此心雖復如是內住、等住，然由失念於外散亂。復還攝錄安置內境，故名安住。

四、近住

云何近住？謂彼先應如是如是親近念住，由此念故，數數作意，內住其心，不令此心遠住於外，故名近住。

五、調順

云何調順？謂種種相令心散亂，所謂色、聲、香、味、觸相，及貪、瞋、癡、男、女等相故，彼先應取彼諸相為過患想。

由如是想增上力故，於彼諸相，折挫其心，不令流散，故名調順。

六、寂靜

云何寂靜？謂有種種欲、恚、害等諸惡尋思，貪欲蓋等諸隨煩惱，令心擾動，故彼先應取彼諸法為過患想。

由如是想增上力故，於諸尋思及隨煩惱，止息其心，不令流散，故

名寂靜。

七、最極寂靜

云何名為最極寂靜？謂失念故，即彼二種暫現行時，隨所生起諸惡尋思及隨煩惱，能不忍受，尋即斷滅、除遣、變吐，是故名為最極寂靜。

八、專注一趣

云何名為專注一趣？謂有加行有功用，無缺無間三摩地相續而住，是故名為專注一趣。

九、等持

云何等持？謂數修、數習、數多修習為因緣故，得無加行無功用任運轉道，由是因緣，不由加行、不由功用，心三摩地任運相續無散亂轉，故名等持。

奢摩他是獲得「等持」並有身心輕安，此時是初禪近分定。接著，禪修者可以往上修「世間道」的四色界禪和四無色定，或直接去修「出世間道」來滅苦。

(二)、修定的蓋障

復次，於諸靜慮、等至障中，略有五蓋，將證彼時能為障礙。何等為五？一、貪欲蓋；二、瞋恚蓋；三、昏沈、睡眠蓋；四、掉舉、惡作蓋；五、疑蓋。

1. 貪欲者，謂於妙五欲，隨逐淨相，欲見、欲聞乃至欲觸，或隨憶念先所領受，尋伺追戀。

2. 瞋恚者，謂或因同梵行等舉其所犯，或因憶念昔所曾經不饒益事瞋恚之相，心生恚怒，或欲當作不饒益事，於當所為瞋恚之相，多隨尋伺，心生恚怒。

3a 昏沈者，謂或因毀壞淨尸羅等隨一善行，不守根門，食不知量，不勤精進減省睡眠，不正知住，而有所作，於所修斷不勤加行，隨順生起一切煩惱，身心昏昧，無堪任性。

3b 睡眠者，謂心極昧略。

4a 掉舉者，謂因親屬尋思、國土尋思、不死尋思，或隨憶念昔所經歷戲笑、歡娛所行之事，心生誼動、騰躍之性。

4b 惡作者，謂因尋思親屬等故，心生追悔，謂：「我何緣離別親

屬？何緣不往如是國土？何緣棄捨如是國土來到於此，食如是食，飲如是飲，唯得如是衣服臥具，病緣醫藥，資身眾具？我本何緣少小出家，何不且待至年衰老？」或因追念昔所曾經戲笑等事，便生悔恨，謂：「我何緣於應受用戲樂、嚴具、朋遊等時，違背宗親朋友等意，令其悲戀涕淚盈目，而強出家？」由如是等種種因緣，生憂戀心，惡作追悔。

5. 疑者，謂於師、於法、於學、於誨及於證中，生惑生疑，由心如是懷疑惑故，不能趣入勇猛方便，正斷寂靜。又於去、來、今及苦等諦，生惑生疑，心懷二分，迷之不了，猶豫猜度。

(三)、靜慮的支分

復次，於初靜慮，具足五支：一、尋；二、伺；三、喜；四、樂；五、心一境性。

第二靜慮有四支：一、內等淨；二、喜；三、樂；四、心一境性。

第三靜慮有五支：一、捨；二、念；三、正知；四、樂；五、心一境性。

第四靜慮有四支：一、捨清淨；二、念清淨；三、不苦不樂受；四、心一境性。

(四)、正定的定型句

南傳《大念住經》說：

諸比丘！正定者何耶？

諸比丘！於此，比丘 A 離欲、離惡不善法，有尋、有伺，由離生喜、樂，具足初禪而住。B 尋伺止息，內心等淨，心一趣性，無尋、無伺，由定生喜、樂，具足第二禪而住。C 離喜住捨，正念、正知，身樂受，體驗諸聖者宣說之『以捨、念而住之樂』，具足第三禪而住。D 離樂、離苦，斷先前所有之喜、憂，不苦不樂，捨念清淨，具足第四禪而住。

諸比丘！此名正定。

北傳《法蘊足論》說：

云何正定？

謂聖弟子於苦思惟苦，乃至於道思惟道，無漏作意相應所有心住、等住、近住、安住、不散、不亂、攝止、等持、心一境性，是名正定。

三、菩薩道的禪定

《瑜伽師地論》卷 43 說：

云何菩薩一切靜慮？謂此靜慮略有二種。一者、世間靜慮，二者、出世間靜慮。當知此二，隨其所應復有三種。一者、現法樂住靜慮，二者、能引菩薩等持功德靜慮，三者、饒益有情靜慮。

(一)、現法樂住靜慮

若諸菩薩所有靜慮，遠離一切分別，能生身心輕安，最極寂靜，遠離憍舉，離諸愛味，泯一切相，當知是名菩薩現法樂住靜慮。

(二)、能引菩薩等持功德靜慮

a 若諸菩薩所有靜慮能引能住種種殊勝、不可思議、不可度量十力種性所攝等持。如是等持，一切聲聞及獨覺等不知其名，何況能入！【見附錄】

b 若諸菩薩所有靜慮能引能住一切菩薩解脫、勝處、遍處、無礙解、無諍、願智等共諸聲聞所有功德。

當知是名能引菩薩等持功德靜慮。

(三)、饒益有情靜慮

菩薩饒益有情靜慮有十一種，如前（饒益有情戒）應知：謂諸菩薩依止靜慮：

1. 於諸有情能引義利，彼彼事業與作助伴，於有苦者，能為除苦；
2. 於諸有情能如理說；

3. 於有恩者知恩知惠，現前酬報；
 4. 於諸怖畏，能為救護；
 5. 於喪失處，能解愁憂；
 6. 於有匱乏，施與資財；
 7. 於諸大眾善能匡御；
 8. 於諸有情善隨心轉；
 9. 於實有德，讚美令喜；
 10. 於諸有過，能正調伏；
 11. 為物現通，恐怖引攝。
- 如是一切總名菩薩一切靜慮，此外無有若過、若增。

四、結語

世尊告苾芻眾：有四修定。何等為四？

- (a) 謂有修定，若習、若修、若多所作，能令證得現法樂住。
- (b) 復有修定，若習、若修、若多所作，能令證得殊勝智見。
- (c) 復有修定，若習、若修、若多所作，能令證得勝分別慧。
- (d) 復有修定，若習、若修、若多所作，能令證得諸漏永盡。

聲聞道以禪定配合智慧，來滅生死輪迴的苦。
菩薩道以「饒益有情靜慮」來利益一切眾生。

【附錄】菩薩摩訶薩的 113 種定（三摩地）

《大般若波羅蜜多經》卷 414 說：

- (1) 云何名為健行三摩地？謂若住此三摩地時，能受一切三摩地境，能辦無邊殊勝健行，能為一切等持導首，是故名為健行三摩地。
- (2) 云何名為寶印三摩地？謂此三摩地能印一切定，是故名為寶印三摩地。
- (3) 云何名為師子遊戲三摩地？謂若住此三摩地時，於諸勝定遊戲自在，是故名為師子遊戲三摩地。
- (4) 云何名為妙月三摩地？謂若住此三摩地時，如淨滿月普照諸定，是故名為妙月三摩地。

- (5) 云何名為月幢相三摩地？謂若住此三摩地時，普能任持諸定勝相，是故名為月幢相三摩地。
- (6) 云何名為一切法涌三摩地？謂若住此三摩地時，普能涌出一切勝定，是故名為一切法涌三摩地。
- (7) 云何名為觀頂三摩地？謂若住此三摩地時，普能觀察一切定頂，是故名為觀頂三摩地。
- (8) 云何名為法界決定三摩地？謂若住此三摩地時，能於法界決定照了，是故名為法界決定三摩地。
- (9) 云何名為決定幢相三摩地？謂若住此三摩地時，能決定持諸定幢相，是故名為決定幢相三摩地。
- (10) 云何名為金剛喻三摩地？謂若住此三摩地時，能摧諸定非彼所伏，是故名為金剛喻三摩地。
- (11) 云何名為入法印三摩地？謂若住此三摩地時，普能證入一切法印，是故名為入法印三摩地。
- (12) 云何名為放光無忘失三摩地？謂若住此三摩地時，放勝定光照有情類，令彼憶念曾所受法，是故名為放光無忘失三摩地。
- (13) 云何名為善立定王三摩地？謂若住此三摩地時，於諸定王善能建立，是故名為善立定王三摩地。
- (14) 云何名為放光三摩地？謂若住此三摩地時，於諸定光普能開發，是故名為放光三摩地。
- (15) 云何名為精進力三摩地？謂若住此三摩地時，能發諸定精進勢力，是故名為精進力三摩地。
- (16) 云何名為等涌三摩地？謂若住此三摩地時，令諸等持平等涌現，是故名為等涌三摩地。
- (17) 云何名為入一切言詞決定三摩地？謂若住此三摩地時，於諸言詞決定悟入，是故名為入一切言詞決定三摩地。
- (18) 云何名為等入增語三摩地？謂若住此三摩地時，於諸定名普能悟入訓釋理趣，是故名為等入增語三摩地。
- (19) 云何名為觀方三摩地？謂若住此三摩地時，於諸定方普能觀照，是故名為觀方三摩地。
- (20) 云何名為總持印三摩地？謂若住此三摩地時，能總任持諸定妙印，是故名為總持印三摩地。
- (21) 云何名為無忘失三摩地？謂若住此三摩地時，於諸定相皆無忘失，是故名為無忘失三摩地。

- (22) 云何名為諸法等趣海印三摩地？謂若住此三摩地時，令諸勝定等皆趣入，如大海印攝受眾流，是故名為諸法等趣海印三摩地。
- (23) 云何名為遍覆虛空三摩地？謂若住此三摩地時，於諸等持遍能覆護，無所簡別如太虛空，是故名為遍覆虛空三摩地。
- (24) 云何名為金剛輪三摩地？謂若住此三摩地時，普能任持一切勝定，令不散壞如金剛輪，是故名為金剛輪三摩地。
- (25) 云何名為離塵三摩地？謂若住此三摩地時，能滅一切煩惱纏垢，是故名為離塵三摩地。
- (26) 云何名為遍照三摩地？謂若住此三摩地時，遍照諸定令其光顯，是故名為遍照三摩地。
- (27) 云何名為不眴三摩地？謂若住此三摩地時，更不希求餘定餘法，是故名為不眴三摩地。
- (28) 云何名為無相住三摩地？謂若住此三摩地時，不見諸定中有少法可住，是故名為無相住三摩地。
- (29) 云何名為不思惟三摩地？謂若住此三摩地時，所有下劣心、心所法悉皆不轉，是故名為不思惟三摩地。
- (30) 云何名為無垢燈三摩地？謂若住此三摩地時，如持淨燈照了諸定，是故名為無垢燈三摩地。
- (31) 云何名為無邊光三摩地？謂若住此三摩地時，能發大光照無邊際，是故名為無邊光三摩地。
- (32) 云何名為發光三摩地？謂若住此等持無間，能發一切勝定光明，是故名為發光三摩地。
- (33) 云何名為普照三摩地？謂若得此等持無間，即能普照諸勝定門，是故名為普照三摩地。
- (34) 云何名為淨堅定三摩地？謂若住此三摩地時，得諸等持淨平等性，是故名為淨堅定三摩地。
- (35) 云何名為無垢光三摩地？謂若住此三摩地時，能普蠲除一切定垢，是故名為無垢光三摩地。
- (36) 云何名為發妙樂三摩地？謂若住此三摩地時，領受一切等持妙樂，是故名為發妙樂三摩地。
- (37) 云何名為電燈三摩地？謂若住此三摩地時，照諸等持如電光焰，是故名為電燈三摩地。
- (38) 云何名為無盡三摩地？謂若住此三摩地時，引諸等持功德無盡，而不見彼盡不盡相，是故名為無盡三摩地。

- (39) 云何名為具威光三摩地？謂若住此三摩地時，於諸等持威光獨盛，是故名為具威光三摩地。
- (40) 云何名為離盡三摩地？謂若住此三摩地時，見諸等持一切無盡，而不見有盡不盡相，是故名為離盡三摩地。
- (41) 云何名為無動三摩地？謂若住此三摩地時，令諸等持無動無掉亦無戲論，是故名為無動三摩地。
- (42) 云何名為無瑕隙三摩地？謂若住此三摩地時，令諸等持見無瑕隙，是故名為無瑕隙三摩地。
- (43) 云何名為日燈三摩地？謂若住此三摩地時，令諸定門發光普照，是故名為日燈三摩地。
- (44) 云何名為淨月三摩地？謂若住此三摩地時，令諸等持除闇如月，是故名為淨月三摩地。
- (45) 云何名為淨光三摩地？謂若住此三摩地時，於一切等持得四無礙解，是故名為淨光三摩地。
- (46) 云何名為發明三摩地？謂若住此三摩地時，令諸定門發明普照，是故名為發明三摩地。
- (47) 云何名為作所應作三摩地？謂若住此三摩地時，辦諸等持所應作事，又令諸定所作事成，是故名為作所應作三摩地。
- (48) 云何名為智幢相三摩地？謂若住此三摩地時，見諸等持妙智幢相，是故名為智幢相三摩地。
- (49) 云何名為金剛鬘三摩地？謂若住此三摩地時，雖能通達一切法，而不見有通達相，是故名為金剛鬘三摩地。
- (50) 云何名為住心三摩地？謂若住此三摩地時，心不動搖，不轉、不照亦不損減，不念有心，是故名為住心三摩地。
- (51) 云何名為普明三摩地？謂若住此三摩地時，於諸定明普能觀照，是故名為普明三摩地。
- (52) 云何名為善住三摩地？謂若住此三摩地時，於諸等持善能安住，是故名為善住三摩地。
- (53) 云何名為寶積三摩地？謂若住此三摩地時，觀諸等持皆如寶聚，是故名為寶積三摩地。
- (54) 云何名為妙法印三摩地？謂若住此三摩地時，能印諸等持以無印印故，是故名為妙法印三摩地。
- (55) 云何名為一切法平等性三摩地？謂若住此三摩地時，不見有法離平等性，是故名為一切法平等性三摩地。

- (56) 云何名為捨愛樂三摩地？謂若住此三摩地時，於一切法捨諸愛樂，是故名為捨愛樂三摩地。
- (57) 云何名為入法頂三摩地？謂若住此三摩地時，於一切法能除闇障，亦於諸定能為上首，是故名為入法頂三摩地。
- (58) 云何名為飄散三摩地？謂若住此三摩地時，飄散一切定執、法執，是故名為飄散三摩地。
- (59) 云何名為分別法句三摩地？謂若住此三摩地時，善能分別諸定法句，是故名為分別法句三摩地。
- (60) 云何名為平等字相三摩地？謂若住此三摩地時，得諸等持平等字相，是故名為平等字相三摩地。
- (61) 云何名為離文字相三摩地？謂若住此三摩地時，於諸等持不得一字，是故名為離文字相三摩地。
- (62) 云何名為斷所緣三摩地？謂若住此三摩地時，絕諸等持所緣境相，是故名為斷所緣三摩地。
- (63) 云何名為無變異三摩地？謂若住此三摩地時，不得諸法變異之相，是故名為無變異三摩地。
- (64) 云何名為無品類三摩地？謂若住此三摩地時，不見諸法品類別相，是故名為無品類三摩地。
- (65) 云何名為無相行三摩地？謂若住此三摩地時，於諸定相都無所得，是故名為無相行三摩地。
- (66) 云何名為離翳闇三摩地？謂若住此三摩地時，諸定翳闇無不除遣，是故名為離翳闇三摩地。
- (67) 云何名為具行三摩地？謂若住此三摩地時，於諸定行都無見執，是故名為具行三摩地。
- (68) 云何名為不變動三摩地？謂若住此三摩地時，於諸等持不見變動，是故名為不變動三摩地。
- (69) 云何名為度境界三摩地？謂若住此三摩地時，超諸等持所緣境界，是故名為度境界三摩地。
- (70) 云何名為集一切功德三摩地？謂若住此三摩地時，能集諸定所有功德，於一切法而無集想，是故名為集一切功德三摩地。
- (71) 云何名為決定住三摩地？謂若住此三摩地時，於諸定心雖決定住，而知其相了不可得，是故名為決定住三摩地。
- (72) 云何名為無心住三摩地？謂若住此三摩地時，心於諸定無轉無墮，是故名為無心住三摩地。

- (73) 云何名為淨妙花三摩地？謂若住此三摩地時，令諸等持皆得清淨，嚴飾光顯猶如妙花，是故名為淨妙花三摩地。
- (74) 云何名為具覺支三摩地？謂若住此三摩地時，令一切定修七覺支速得圓滿，是故名為具覺支三摩地。
- (75) 云何名為無邊燈三摩地？謂若住此三摩地時，於一切法皆能照了譬如明燈，是故名為無邊燈三摩地。
- (76) 云何名為無邊辯三摩地？謂若住此三摩地時，於一切法得無邊辯，是故名為無邊辯三摩地。
- (77) 云何名為無等等三摩地？謂若住此三摩地時，於諸等持得平等性，亦令諸定成無等等，是故名為無等等三摩地。
- (78) 云何名為超一切法三摩地？謂若住此三摩地時，普能超度三界諸法，是故名為超一切法三摩地。
- (79) 云何名為決判諸法三摩地？謂若住此三摩地時，於諸勝定及一切法，能為有情如實決判，是故名為決判諸法三摩地。
- (80) 云何名為散疑網三摩地？謂若住此三摩地時，於諸等持及一切法，所有疑網皆能除散，是故名為散疑網三摩地。
- (81) 云何名為無所住三摩地？謂若住此三摩地時，不見諸法有所住處，是故名為無所住三摩地。
- (82) 云何名為一相莊嚴三摩地？謂若住此三摩地時，不見諸法二相可取，是故名為一相莊嚴三摩地。
- (83) 云何名為引發行相三摩地？謂若住此三摩地時，於諸等持及一切法雖能引發種種行相，而都不見能引發者，是故名為引發行相三摩地。
- (84) 云何名為一行相三摩地？謂若住此三摩地時，見諸等持無二行相，是故名為一行相三摩地。
- (85) 云何名為離行相三摩地？謂若住此三摩地時，見諸等持都無行相，是故名為離行相三摩地。
- (86) 云何名為妙行相三摩地？謂若住此三摩地時，令諸等持起妙行相，是故名為妙行相三摩地。
- (87) 云何名為達諸有底散壞三摩地？謂若住此三摩地時，於諸等持及一切法，得通達智如實悟入，既得入已於諸有法通達散壞令無所遺，是故名為達諸有底散壞三摩地。
- (88) 云何名為入施設語言三摩地？謂若住此三摩地時，悟入一切三摩地法，施設語言無著無礙，是故名為入施設語言三摩地。

- (89) 云何名為解脫音聲文字三摩地？謂若住此三摩地時，見諸等持解脫一切音聲文字眾相寂滅，是故名為解脫音聲文字三摩地。
- (90) 云何名為炬熾然三摩地？謂若住此三摩地時，於諸等持威光照曜，是故名為炬熾然三摩地。
- (91) 云何名為嚴淨相三摩地？謂若住此三摩地時，於諸等持能嚴淨相，謂於諸相皆能除滅，是故名為嚴淨相三摩地。
- (92) 云何名為無標幟三摩地？謂若住此三摩地時，於諸等持不見標幟，是故名為無標幟三摩地。
- (93) 云何名為具一切妙相三摩地？謂若住此三摩地時，諸定妙相無不具足，是故名為具一切妙相三摩地。
- (94) 云何名為不喜一切苦樂三摩地？謂若住此三摩地時，於諸等持苦樂之相不樂觀察，是故名為不喜一切苦樂三摩地。
- (95) 云何名為無盡行相三摩地？謂若住此三摩地時，不見諸定行相有盡，是故名為無盡行相三摩地。
- (96) 云何名為具陀羅尼三摩地？謂若住此三摩地時，能總任持諸定勝事，是故名為具陀羅尼三摩地。
- (97) 云何名為攝伏一切正性邪性三摩地？謂若住此三摩地時，於諸等持正性邪性攝伏諸見皆令不起，是故名為攝伏一切正性邪性三摩地。
- (98) 云何名為靜息一切違順三摩地？謂若住此三摩地時，於諸等持及一切法，都不見有違順之相，是故名為靜息一切違順三摩地。
- (99) 云何名為離憎愛三摩地？謂若住此三摩地時，於諸等持及一切法，都不見有憎愛之相，是故名為離憎愛三摩地。
- (100) 云何名為無垢明三摩地？謂若住此三摩地時，於諸等持都不見有明相、垢相，是故名為無垢明三摩地。
- (101) 云何名為具堅固三摩地？謂若住此三摩地時，令諸等持皆得堅固，是故名為具堅固三摩地。
- (102) 云何名為滿月淨光三摩地？謂若住此三摩地時，令諸等持功德增益，如淨滿月光增海水，是故名為滿月淨光三摩地。
- (103) 云何名為大莊嚴三摩地？謂若住此三摩地時，令諸等持成就種種微妙希有大莊嚴事，是故名為大莊嚴三摩地。
- (104) 云何名為照一切世間三摩地？謂若住此三摩地時，照諸等持及一切法，令有情類皆得開曉，是故名為照一切世間三摩地。

- (105) 云何名為定平等性三摩地？謂若住此三摩地時，不見等持定散差別，是故名為定平等性三摩地。
- (106) 云何名為有諍無諍平等理趣三摩地？謂若住此三摩地時，不見諸法及一切定有諍無諍性相差別，是故名為有諍無諍平等理趣三摩地。
- (107) 云何名為無巢穴無標幟無愛樂三摩地？謂若住此三摩地時，破諸巢穴，捨諸標幟，斷諸愛樂而無所執，是故名為無巢穴無標幟無愛樂三摩地。
- (108) 云何名為決定安住真如三摩地？謂若住此三摩地時，於諸等持及一切法，常不棄捨真如實相，是故名為決定安住真如三摩地。
- (109) 云何名為離身穢惡三摩地？謂若住此三摩地時，令諸等持破壞身見，是故名為離身穢惡三摩地。
- (110) 云何名為離語穢惡三摩地？謂若住此三摩地時，令諸等持壞語惡業，是故名為離語穢惡三摩地。
- (111) 云何名為離意穢惡三摩地？謂若住此三摩地時，令諸等持壞意惡業，是故名為離意穢惡三摩地。
- (112) 云何名為如虛空三摩地？謂若住此三摩地時，於諸有情普能饒益，其心平等如太虛空，是故名為如虛空三摩地。
- (113) 云何名為無染著如虛空三摩地？謂若住此三摩地時，觀一切法都無所有，如淨虛空無染無著，是故名為無染著如虛空三摩地。

善現！如是等有無量百千微妙希有勝三摩地，當知是為菩薩摩訶薩大乘相。